

# INUIT ATAQATIGIIT

## INATSISARTUNI



UPA16/64  
24.maj 2016  
Peter Olsen

**Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit inatsisartut inatsisaata nr. 16, 3. December 2012-imeersup allanngortinneqartariaqarnerisooq pillugu apeqquteqaat aallaavigalugu oqallinnissamik siunnersuut. Meeqquerivinni meeraaqquerivinnilu pisortat allaffissornerujussuarmik suliaqarnerisa oqilisaaffigineqarnissaat qanoq ilillugu oqilisaaffigineqarsinnaava ?**

(Inatsisartunut ilaasortaq Anthon Frederiksen, Partii Naleraq)

Inatsisartunut ilaasortap Anthon Frederiksenip Partii Naleqqamiit apeqquteqaat aallaavigalugu oqallinnissamik siunnersuutaanut qulaani pineqartumut matumuuna Inuit Ataqatigiinniit imatut oqaaseqaateqassaavut.

Naatumik oqaatigalugu Anthon Frederiksen isumaqatiginngilarput meeraaqquerivinni meeqquerivinnilu ittuusut ningiuusulluunniit perorsaausut ilinniarsimasuunatik allaffissornerikkut ilinniarsimasuusariaqarnerannik oqariartuuteqarneranut.

Anthon Frederiksen isumaqatiginngilarput oqariartormat meeqquerivinni allaffissornerujussuup kingunerisaanik meeqqat sammineqaratik sumiginnarneqartartut.

Anthon Frederiksen aamma isumaqatiginngilarput oqariartormat allaffissornerikkut ilinniarsimasumik pisortanngortitsinikkut, meeqqat meeqquerivimmiittut sammineqarnissaminut aatsaat piffissaqarfigineqarnerulissasut.

Taamatut isumaqataanginnitsinnut tunngavilersuutigaarput meeqqeriveqarnek pillugu inatsisartut inatsisaanni nr. 16, 3. December 2012-imeersumi § 19-mi immikkoortoq 2-mi ima allassimasooqar-mat:

*"Imm. 2. Meeqqueriviup pisortaa inini sulisut amerlassusissaattut aalajangiussanut ilaangilaq"*

§ 19-ip imm. 2-ip takutippaa meeqqat allaffissorneriveqarnek pissutaalluni sumiginnarneqarsinnaangitsut. Meeqquerivimmi meeqqat naammatunik sulisoqarnissaat tassuuna qulakkeerneqarpoq illersorneqarlunilu.

Taamaattumik Anthon Frederiksenip meeqquerivinni allaffissornerujussuannik oqariartuutaa allamik peqquteqarsimasinnaasooq pasitsaanneqarsinnaavoq.. Ajornartorsiut allamiissimassaaq allatullu iliornikkut ajornartorsiut tamanna aqqinniagassaassalluni.

Aamma meeqquerivinni pisortat allaffimmiuusariaqarnerannik Anthon Frederiksenip oqariartuutaa isumaqatiginngilarput. Meeqquerivinni pisortaausut perorsaanermik ilinniarsimasuusariaqarnerat Inuit Ataqatigiinniit pingaaruteqartutut isigaarput.

Perorsaanermik ilinniarsimasup ilisimalluarnepaavaa meeraq qanoq paaqqutarineqassanersooq, meeqqap pisariaqartitaa naapertorlugu ullup ingerlanissaanik pilersaarusiornissaq nalunnginnerpaavaa, nalunnginnerpaavaa sulisut qanoq kaammattorlugillu ikorfartorneqassanersut.

Pisariaqartitat tamaasa pigivai. Taamaallaat apeqqutaaginnalerpoq pisortaausup allaffissornerup tungaatigut qanoq nukittutiginera. Aap, imaassinnaavoq meeqqeriviit ilaanni allaffissornerikkut nukilaattoqartoq. Taava taamaattoqarsimappat ullumikkut allaffissornerikkut aqutsinikkullu

pikkorissarfissatut periarfissaareersut atorluarniarnerusariaqartut Inuit Ataqatigiinniit isumaqarpugut.

Meeqquerivinni pisortaatitta allaffissornikkut aqutsinikkullu sanngiiffeqarsimappata, taava pikkorissarnissamut periarfissarititaasut annertusarneqartariaqartut Inuit Ataqatigiinniit isumaqarpugut.

Taassuma saniatigut perorsaasut nunatsinni amerlanerulernissaat, pingaartinneqarnerulernissaat, atugarissaarnerulernissaallu anguniarlugu sulissuteqartariaqartugut Inuit Ataqatigiinniit isumaqarpugut.

Perorsaasortagut ataqqineqarnerulertariaqarput akissarsiallu tungaatigut atugarissaarnerulertariaqarput. Akisussaaffimmik annertoorujussuarmik tigummiarput.

Ulloq tamaat uagut angajoqqaajusugut sinnerluta meerartagut paarisarpaat, akisussaaffimmik annerorujussuarmik tunineqartarput, soormi taava akisussaaffimmik taama annertugisumik tunisinnaagutsigit sooq aamma taava annerusumik ajunngitsorsiassaqaartilersinnaanngilagut?

Meerartatta meeqquerivinni ulluinnarni atugarisaat pitsanngorsarneqassappata, allaffissornerinnakkuunngitsoq, aammali perorsaasutsinnut isiginnittaaserput pitsaanerulertariaqartoq, minnerunngitsumillu akissarsiaasa tungaatigut pitsanngorsaasoqartariaqartoq, Inuit Ataqatigiinniit isumaqarluinnarpugut.

Taamaattumik Inuit Ataqatigiinniit nuannaarutigaarput perorsaasutta pitsaanagerusumik atugaqalernissaat pillugu oqariartuuteqarsinnaagatta, una apeqquteqaat aallaavigalugu oqallinnissamik siunnersuut aqutugalugu

Taamatut oqaaseqarluta Anthon Frederiksenip inatsisartut ataatsimoortut oqaaseqaatissaatut siunnersuutaa taperserlugu oqallilluarnissassinnik kissaappassi.